

Gellius, multis esse infantibus nutritionem ex lacte, & consuetudine propriæ Matris, quàm alterius extraneæ. Hinc Sara uberibus propriis Isaacum, Rebecca Elau, & Jacobum, Anna Samuelem, aliæque Mulieres sanctæ filios suos enutriverunt. De Scotis etiam veteribus dicitur, Nutrices lactandis infantibus non accersisse, sed suo proprio lacte ipsas Matres proles educasse. Unde Augustinus se cum Matris lacte Dei honorem, & venerationem hausisse fatebatur.

X. PER SPATIUM TRIGINTA ANNORUM) *Putat usque ad annum circiter 1470.* Papebrochius annotat. Sed ita scribit, suam sequens chronologiam, qua nimirum facit S. Patrem anno 1439. ortum. Sua nihilominus peculiaris hæc opinio est, quam in Dissert. 2. examinabimus, & explodemus; Interim communis ferè omnium Scriptorum est, ut Franciscus natus fuerit anno 1416. quibus si triginta illi anni addantur, fiet ut S. Patris Genitores, post ejus ortum, simul vixerint usque ad annum 1446. Hoc anno Vienna Mater mortua est, ipsi enim Jacobus fuit superstes; qui proinde Ordini nuper à filio instituto nomen dedit, ejus se filium faciens, cujus ipse Pater erat.

XI. IN VOTO CASTITATIS) Non hæc accidisse intelligenda sunt statim postquam Franciscus natus fuit. Præmittuntur enim verbis istis alia verba, quibus indicatur potuisse etiam liberis gignendis post S. Francisci natiuitatem operam dare. *Et bona Mater eum tenere enutriuit propriis mammillis &c.* Post quæ subjungitur: *Et ipsa cum Jacobo considerantes, quod parum eis proficeret soboles concipere, vixerunt simul &c.* Unde tempore illo, quo Franciscus à bona Matre nutritus fuit, & quod dicitur ipsorum considerationem præcessisse, potuerunt Parentes ejus aliis filiis procreandis vacare. Eo vel ma-